

四庫全書

集部

欽定四庫全書

集部

御選唐宋文醇卷六

七

詳校官左都御史臣李紱

主事銜臣徐以坤覆勘

總校官編修臣王燕緒

校對官中書臣雷純

謄錄監生臣韓蜚聲

欽定四庫全書

御選唐宋文醇卷六目錄

昌黎韓愈文六

記議狀表

汴州東西水門記

燕喜亭記

藍田縣丞廳壁記

新修滕王閣記

禘祫議

論淮西事宜狀

論今年權停舉選狀

論佛骨表

為裴相公讓官表

欽定四庫全書

御選唐宋文醇卷六

昌黎韓愈文六

汴州東西水門記

貞元十四年正月戊子隴西公命作東西水門越三月
辛巳朔水門成三日癸未大合樂設水嬉會監軍軍司
馬賓佐屬將校熊罷之士肅四方之賓客以落之士女
輿會聞郭湓郭既卒事其從事昌黎韓愈請紀成績其

詞曰

維汴州河水自中注厥初距河為城其不合者誕寔聯
鎖於河宵浮晝湛舟不潛遁然其襟抱虧疏風氣宣洩
邑居弗寧訛言屢騰歷載已來孰究孰思皇帝御天下
十有八載此邦之人遭逢疾威囂童噉噬劫衆阻兵慄
慄栗栗若墜若覆時維隴西公受命作藩爰自洛京單
車來臨遂拯其危遂去其疵弗肅弗厲薰為大和神應
祥福五穀穰熟既庶而豐人力有餘監軍是咨司馬是

謀乃作水門為邦之郭以固風氣以閉寇偷黃流渾渾
飛閭渠渠因而飾之匪為觀遊天子之武維隴西公是
布天子之文維隴西公是宣河之汙汙源於崑崙天子
萬祀公多受祉乃伐山石刻之日月尚俾來者知作之
所始

樊汝霖曰公時佐董晉在汴州作陳后山云退之作記
記事耳今之作記乃論也以后山語觀公諸記信然

--	--	--	--	--	--	--	--

燕喜亭記

太原王弘中在連州與學佛人景常元慧游異日從二人者行於其居之後丘荒之間上高而望得異處焉斬茅而嘉樹列發石而清泉激輦糞壤燔櫛翳却立而視之出者突然成丘陷者呀然成谷窪者為池而缺者為洞若有鬼神異物陰來相之自是弘中與二人者晨往而夕忘歸焉乃立屋以避風雨寒暑既成愈請名之其丘曰埃德之丘蔽於古而顯於今有埃之道也其石谷

曰謙受之谷瀑曰振鷺之瀑谷言德瀑言容也其土谷
曰黃金之谷瀑曰秩秩之瀑谷言容瀑言德也洞曰寒
居之洞志其入時也池曰君子之池虛以鍾其美盈以
出其惡也泉之源曰天澤之泉出高而施下也合而名
之以屋曰燕喜之亭取詩所謂魯侯燕喜者頌也於是
州民之老聞而相與觀焉曰吾州之山水名天下然而
無與燕喜者比經營於其側者相接也而莫直其地凡
天作而地藏之以遺其人乎弘中自吏部郎貶秩而來

次其道途所經自藍田入商洛涉淅湍臨漢水升峴首
以望方城出荆門下岷江過洞庭上湘水行衡山之下
繇郴踰嶺猿狖所家魚龍所宮極幽遐瑰詭之觀宜其
於山水飲聞而厭見也今其意乃若不足傳曰知者樂
水仁者樂山弘中之德與其所好可謂協矣智以謀之
仁以居之吾知其去是而羽儀於天朝也不遠矣遂刻
石以記

樊汝霖曰王弘中字仲舒自吏部員外郎貶連州司

戶參軍亭在連州公為陽山令時作陽山連之屬邑

云

藍田縣丞廳壁記

丞之職所以貳令於一邑無所不當問其下主簿尉主簿尉乃有分職丞位高而偏例以嫌不可否事文書行吏抱成案詣丞卷其前鉗以左手右手摘紙尾鴈鶩行以進平立睨丞曰當署丞涉筆占位署惟謹目吏問不可吏曰得則退不敢畧省漫不知何事官雖尊力勢反出主簿尉下謗數慢必曰丞至以相訾誓丞之設豈端使然哉博陵崔斯立種學績文以蓄其有泓涵演迤

日大以肆貞元初挾其能戰藝於京師再進再屈於人
元和初以前大理評事言得失黜官再轉而為丞茲邑
始至喟曰官無卑顧材不足塞職既噤不得施用又喟
曰丞哉丞哉余不負丞而丞負余則盡枿去牙角一躡
故跡破崖岸而為之丞廳故有記壞漏汚不可讀斯立
易桷與瓦墁治壁悉書前任人名氏庭有老槐四行南
牆鉅竹千挺儼立若相持水泚泚循除鳴斯立痛掃溉
對樹二松日哦其間有問者輒對曰余方有公事子姑

去

官必有貳古制也猶左右手然左右手皆從其心人果皆以國事為心則正必無嫌其貳貳必無狃其正者雖十百人同一事猶若耳目口鼻手足之共處一身無一之可簡也唯各心其心則雖兩人亦不可共一事為貳者非侵官即曠官為正者非諉事即擅事矣然而責成者必正也於是貳為贅疣焉貳猶贅疣則所謂參者伍者考者殷者輔者又安得而舉其職哉以一人之身而

政事一埤益之則叢脞矣貳以下皆贅疣則惰矣叢脞而惰則萬事隳矣觀昌黎此記唐時州縣之治可知也

新修滕王閣記

愈少時則聞江南多臨觀之美而滕王閣獨為第一有
瑰偉絕特之稱及得三王所為序賦記等壯其文辭益
欲往一觀而讀之以忘吾憂繫官於朝願莫之遂十四
年以言事斥守揭陽便道取疾以至海上又不得過南
昌而觀所謂滕王閣者其冬以天子進大號加恩區內
移刺袁州袁於南昌為屬邑私喜幸自語以為當得躬
詣大府受約束於下執事及其無事且還儻得一至其

處竊寄目償所願焉至州之七月詔以中書舍人太原王公為御史中丞觀察江南西道洪江饒虔吉信撫袁悉屬治所八州之人前所不便及所願欲而不得者公至之日皆罷行之大者驛聞小者立變春生秋殺陽開陰閉令修於庭戶數日之間而人自得於湖山千里之外吾雖欲出意見論利害聽命於幕下而吾州乃無一事可假而行者又安得捨已所事以勤館人則滕王閣又無因而至焉矣其歲九月人吏浹和公與監軍使燕

於此閣文武賓士皆與在席酒半合辭言曰此屋不修
且壞前公為從事此邦適理新之公所為文實書在壁
今三十年而公來為邦伯適及期月公又來燕於此公
烏得無情哉公應曰諾於是棟楹梁桷板檻之腐黑撓
折者蓋瓦級甃之破缺者赤白之漫漶不鮮者治之則
已無侈前人無廢後觀工既訖公公以衆飲而以書命
愈曰予其為我記之愈既以未得造觀為歎竊喜載名
其上詞列三王之次有榮耀焉乃不辭而承公命其江

山之好登望之樂雖老矣如獲從公遊尚能為公賦之
樊汝霖曰滕王閣在洪州公自袁州作此記凡五百
五字首尾叙其不一到為歎而終之曰其江山之好
登望之樂雖老矣如獲從公遊尚能為公賦之蓋叙
事之外所以寄吾不盡之意歐陽永叔為襄守史中
輝記峴山亭尹師魯為襄守燕公記峴山亭蘇子美
為處守李然明記照水堂蘇子瞻為眉守黎希聲記
遠景樓四者其辭雖異而大意畧同豈作文之法當

如是邪抑亦祖公之意而為之也

聖祖御評

禘祫之

聚訟其

衆議修

議紛如
論折衷
以貫井然

禘祫議

右今月十六日勅旨宜令百僚議限五日內聞奏者將
仕郎守國子監四門博士臣韓愈謹獻議曰伏以陛下
追孝祖宗肅敬祀事凡在擬議不敢自專聿求厥中延
訪羣下然而禮文繁漫所執各殊自建中之初迄至今
歲屢經禘祫未合適從臣生遭聖明涵泳恩澤雖賤不
及議而志切效忠今輒先舉衆議之非然後申明其說
一曰獻懿廟主宜永藏之夾室臣以為不可夫祫者合

也毀廟之主皆當合食於太祖獻懿二祖即毀廟主也
今雖藏於夾室至禘祫之時豈得不食於太廟乎名曰
合祭而二祖不得祭焉不可謂之合矣二曰獻懿廟主
宜毀之瘞之臣又以為不可謹按禮記天子立七廟一
壇一墠其毀廟之主皆藏於祧廟雖百代不毀祫則陳
於太廟而饗焉自魏晉已降始有毀瘞之議事非經據
竟不可施行今國家德厚流光創立九廟以周制推之
獻懿二祖猶在壇墠之位況於毀瘞而不禘祫乎三曰

獻懿廟主宜各遷於其陵所臣又以為不可二祖之祭於京師列於太廟也二百年矣今一朝遷之豈惟人聽疑惑抑恐二祖之靈眷顧依遲不即饗於下國也四曰獻懿廟主宜附於興聖廟而不禘祫臣又以為不可傳曰祭如在景皇帝雖太祖其於屬乃獻懿之子孫也今欲正其子東向之位廢其父之大祭固不可為典矣五曰獻懿二祖宜別立廟於京師臣又以為不可夫禮有所降情有所殺是故去廟為祧去祧為壇去壇為墀去

禪為鬼漸而之遠其祭益稀昔者魯立煬宮春秋非之
以為不當取已毀之廟既藏之主而復築宮以祭今之
所議與此正同又雖違禮立廟至於禘祫也合食則禘
無其所廢祭則於義不通此五說者皆所不可故臣博
採前聞求其折中以為殷祖玄王周祖后稷太祖之上
皆自為帝又其代數已遠不復祭之故太祖得正東向
之位子孫從昭穆之列禮所稱者蓋以紀一時之宜非
傳於後代之法也傳曰子雖齊聖不先父食蓋言子為

父屈也景皇帝雖太祖也其於獻懿則子孫也當禘祫之時獻祖宜居東向之位景皇帝宜從昭穆之列祖以孫尊孫以祖屈求之神道豈遠人情又常祭甚衆合祭甚寡則是太祖所屈之祭至少所伸之祭至多比於仲孫之尊廢祖之祭不亦順乎事異殷周禮從而變非所失禮也臣伏以制禮作樂者天子之職也陛下以臣議有可采粗合天心斷而行之是則為禮如以為猶或可疑乞召臣對面陳得失庶有發明謹議

朱子曰此等公家文字或施於君上或布之吏民只用當時體式直述事意未嘗故為新巧以失莊敬平易之體但其間反覆曲折說盡事理是真文章他人自不能及耳

又曰按韓公本意獻祖為始祖其主當居初室百世不遷懿祖之主則當遷於太廟之西夾室而太祖以下以次列於諸室四時之享則惟懿祖不與而獻祖太祖以下各祭於其室室自為等不相降厭所謂所

伸之祭常多者也禘祫則惟獻祖居東向之位而獻
祖太祖以下皆序昭穆南北相向於前所謂祖以孫
尊孫以祖屈而所屈之祭嘗少者也韓公禮學精深
蓋諸儒所不及故其所議獨深得夫孝子慈孫報本
返始不忘所由生本意真可謂萬世之通法矣程子
以為不可漫觀者此類是也

--	--	--	--	--	--	--	--

論淮西事宜狀

右臣伏以淮西三州之地自少陽疾病去年春夏已來
圖為今日之事有職位者勞於計慮撫循奉所役者修
其器械防守金帛糧畜耗於賞給執兵之卒四向侵掠
農夫織婦攜持幼弱餉於其後雖時侵掠小有所得力
盡筋疲不償其費又聞畜馬甚多自半年已來皆上槽
樗譬如有人雖有十夫之力自朝及夕常自大呼跳躍
初雖可畏其勢不久必自委頓乘其力衰三尺童子可

使制其死命況以三小州殘弊困劇之餘而當天下之全力其破敗可立而待也然所未可知者在陛下斷與不斷耳夫兵不多不足以必勝必勝之師必在速戰兵多而戰不速則所費必廣兩界之間疆場之上日相攻劫必有殺傷近賊州縣徵役百端農夫織婦不得安業或時小遇水旱百姓愁苦當此之時則人人異議以惑陛下之聽陛下持之不堅半途而罷傷威損費為弊必深所以要先決於心詳度本末事至不惑然可圖功為

統帥者盡力行之於前而參謀議者盡心奉之於後內外相應其功乃成昔者殷高宗大聖之主也以天子之威伐背叛之國三年乃克不以為遲志在立功不計所費傳曰斷而後行鬼神避之遲疑不斷未有能成其事者也臣謬承恩寵獲掌綸誥地親職重不同庶寮輒竭愚誠以效裨補謹條次平賊事宜一一如後

一諸道發兵或三二千人勢力單弱羈旅異鄉與賊不相諳委望風懾懼難便前進所在將帥以其客兵難處

使先不存優恤待之既薄使之又苦或被分割隊伍隸屬諸頭士卒本將一朝相失心孤意怯難以有功又其本軍各須資遣道路遼遠勞費倍多士卒有征行之艱閭里懷離別之思今聞陳許安唐汝壽等州與賊界連接處村落百姓悉有兵器小小停劫皆能自防習於戰鬪識賊深淺既是土人護惜鄉里比來未有處分猶願自備衣糧共相保聚以備寇賊若令召募立可成軍若要添兵自可取足賊平之後易使歸農伏請諸道先所

追到行營者悉令却牒歸本道據行營所追人額器械
弓矢一物已上悉送行營充給所召募人兵數既足加
之教練三數月後諸道客軍一切可罷比之徵發遠人
利害懸隔

一統逆賊州縣堡柵等各置兵馬都數雖多每處則至
少又相去濶遠難相應接所以數被攻劫致有損傷今
若分為四道每道各置三萬人擇要害地屯聚一處使
有隱然之望審量事勢乘時逐利可入則四道一時俱

發使其狼狽驚惶首尾不相救濟若未可入則深壁高壘以逸待勞自然不要諸處多置防備臨賊小縣可收百姓於便地作行縣以主領之使免散失

一蔡州士卒為元濟迫脅勢不得已遂與王師交戰原其本根皆是國家百姓進退皆死誠可憫傷宜明勅諸軍使深知此意當戰鬪之際固當以盡敵為心若形勢已窮不能為惡者不須過有殺戮喻以聖德放之使歸銷其兇悖之心貸以生全之幸自然相率棄逆歸順

一論語曰欲速則不達見小利則大事不成比來征討
無功皆由欲其速捷有司計算所費苟務因循小不如
意即求休罷河北淮西等見承前事勢知國家必不與
之持久併力苦戰幸其一勝即希冀恩赦朝廷無至忠
憂國之人不惜傷損威重因其有請便議罷兵往日之
事患皆然也臣愚以為淮西三小州之地元濟又甚庸
愚而陛下以聖明英武之姿用四海九州之力除此小
寇難易可知泰山壓卵未足為喻

一兵之勝負實在賞罰賞厚可令廉士動心罰重可令兇人喪魄然可集事不可愛惜所費憚於行刑

一淄青恒冀兩道與蔡州氣類畧同今聞討伐元濟人情必有救助之意然皆闇弱自保無暇虛張聲勢則必有之至於分兵出界公然為惡亦必不敢宜特下詔云蔡州自吳少誠已來相承為節度使亦微有功效少陽之歿朕亦本擬與元濟恐其年少未能理事所以未便處置待其稍能緝綏然後許其承繼今忽自為狂諄侵

掠不受朝命事不得已所以有此討伐至如淄青恒州
范陽等道祖父各有功業相承命節年歲已久朕必不
利其土地輕有改易各宜自安如妄自疑懼敢相扇動
朕即赦元濟不問迴軍討之自然破膽不敢妄有異說
以前件謹錄奏聞伏乞天恩特賜裁擇謹奏

元和九年吳少陽卒其子元濟自立為節度使憲宗欲
討之十年遣御史中丞裴度視師還奏兵可用與宰相
意不合既而盜殺宰相武元衡傷裴度不死憲宗遂相

度以主東兵愈時為中書舍人乃上淮西事宜然由是失宰相意左遷為右庶子憲宗獨斷而相裴度可以卜其中興任宰相意而黜韓愈亦可以知大業之不平矣第一條募土兵罷客軍當與與柳公綽書參觀其言曲盡事勢物情與兵家喜忌第三條即宋太祖諭曹彬下江南之意辟以止辟乃辟則以此毒天下而民從之矣用師之本也第六條異時李德裕用以制澤潞為古今所稱雖然帝王之道不爾也觀史所載肅代德順四朝

雖軍將跋扈而百姓猶思貞觀之澤天猶未厭唐德也使為憲宗者赫然修明綱紀法度旁求碩士正人淨除宦寺專政監軍之敝悉破朝臣黨比軋許之習弛其利網一以與民休養生息腹心既定爪牙既布然後明詔諸鎮以相承命節之非而開以自新之路其尤無良必不順命者六師移之天下未嘗不可定於一也今乃欲許淄青恒范等鎮叛將云必不利其土地輕自改易以此為散其黨叛之謀抑亦未矣夫土地者朝廷之土地

聖祖御

於論

發閣

往有

出諸

也賊臣盜之而曰我不利爾土地則土地已屬之賊臣
為此土地之人民者將安歸命乎子曰必也正名君子
名之必可言也言之必可行也今指賊臣之盜土地者
為其所固有則吳元濟又奚獨不可有蔡哉元濟伏誅
之後淄青等鎮又如何處之奪其節是無信也不奪其
節則一吳元濟死而衆吳元濟仍在也朝廷尚不以相
承命節為非愚民悍卒益習而安之矣而惟吳元濟是
討何以作三軍之氣哉

評
事之中暢
議愈大往
此所以迴
家之上

論今年權停舉選狀

右臣伏見今月十日敕今年諸色舉選宜權停者道路相傳皆云以歲之旱陛下憐閔京師之人慮其乏食故權停舉選以絕其來者所以省費而足食也臣伏思之竊以為十口之家益之以一二人於食未有所費今京師之人不啻百萬都計舉者不過五七千人并其僮僕畜馬不當京師百萬分之一以十口之家計之誠未為有所損益又今年雖旱去歲大豐商賈之家必有儲蓄

舉選者皆齋持資用以有易無未見其弊今若暫停舉選或恐所害實深一則遠近驚惶二則人士失業臣聞古之求雨之詞曰人失職歟然則人之失職足以致旱今緣旱而停舉選是使人失職而召災也臣又聞君者陽也臣者陰也獨陽為旱獨陰為水今者陛下聖明在上雖堯舜無以加之而羣臣之賢不及於古又不能盡心於國與陛下同心助陛下為理有君無臣是以久旱以臣之愚以為宜求純信之士骨鯁之臣憂國如家忘

身奉上者超其爵位置在左右如殷高宗之用傅說周
文王之舉太公齊桓公之拔甯戚漢武帝之取公孫弘
清閒之餘時賜召問必能輔宣王化銷殄旱災臣雖非
朝官月受俸錢歲受祿粟苟有所知不敢不言謹詣光
順門奉狀以聞伏聽聖旨

樊汝霖曰德宗貞元十九年自正月至五月不雨分
命祈禱山川秋七月戊午以闕輔饑罷吏部選禮部
貢舉公時為四門博士抗疏論之其曰雖非朝官蓋

聖祖御誥

義正

祛世

為有

宗

未為御史時也按登科記貞元二十年卒停舉是公雖有此疏而上不從也

方岳貢曰似李尋翼奉災異奏

詞直足以
俗之惑允
居一代儒

論佛骨表

臣某言伏以佛者夷狄之一法耳自後漢時流入中國
上古未嘗有也昔者黃帝在位百年年百一十歲少昊
在位八十年年百歲顓頊在位七十九年年九十八歲
帝嚳在位七十年年百五歲帝堯在位九十八年年百
一十八歲帝舜及禹年皆百歲此時天下太平百姓安
樂壽考然而中國未有佛也其後殷湯亦年百歲湯孫
太戊在位七十五年武丁在位五十九年書史不言其

年壽所極推其年數蓋亦俱不減百歲周文王年九十
七歲武王年九十三歲穆王在位百年此時佛法亦未
入中國非因事佛而致然也漢明帝時始有佛法明帝
在位纔十八年耳其後亂亡相繼運祚不長宋齊梁陳
元魏已下事佛漸謹年代尤促惟梁武帝在位四十八
年前後三度捨身施佛宗廟之祭不用牲牢晝日一食
止於菜果其後竟為侯景所逼餓死臺城國亦尋滅事
佛求福乃更得禍由此觀之佛不足事亦可知矣高祖

始受隋禪則議除之當時羣臣材識不遠不能深知先
王之道古今之宜推闡聖明以救斯弊其事遂止臣常
恨焉伏惟睿聖文武皇帝陛下神聖英武數千百年已
來未有倫比即位之初即不許度人為僧尼道士又不
許創立寺觀臣常以為高祖之志必行於陛下之手今
縱未能即行豈可恣之轉令盛也今聞陛下令羣僧迎
佛骨於鳳翔御樓以觀昇入大內又令諸寺遞迎供養
臣雖至愚必知陛下不惑於佛作此崇奉以祈福祥

也直以年豐人樂徇人之心為京都士庶設詭異之觀
戲翫之具耳安有聖明若此而肯信此等事哉然百姓
愚冥易惑難曉苟見陛下如此將謂真心事佛皆云天
子大聖猶一心敬信百姓何人豈合更惜身命焚頂燒
指百十為羣解衣散錢自朝至暮轉相倣效惟恐後時
老少奔波棄其業次若不即加禁遏更歷諸寺必有斷
臂鬻身以為供養者傷風敗俗傳笑四方非細事也夫
佛本夷狄之人與中國言語不通衣服殊製口不言先

王之法言身不服先王之法服不知君臣之義父子之情假如其身至今尚在奉其國命來朝京師陛下容而接之不過宣政一見禮賓一設賜衣一襲衛而出之於境不令惑衆也況其身死已久枯朽之骨凶穢之餘豈宜令入宮禁孔子曰敬鬼神而遠之古之諸侯行弔於其國尚令巫祝先以桃茢祓除不祥然後進弔今無故取朽穢之物親臨觀之巫祝不先桃茢不用羣臣不言其非御史不舉其失臣實恥之乞以此骨付之有司投

諸水火永絕根本斷天下之疑絕後代之惑使天下之人知大聖人之所作為出於尋常萬萬也豈不盛哉豈不快哉佛如有靈能作禍祟凡有殃咎宜加臣身上天鑒臨臣不怨悔無任感激懇悃之至謹奉表以聞臣某誠惶誠恐

陳善曰韓文公論佛骨表其說始於傅奕奕言五帝三王未有佛法君明臣忠年祚長久至漢明帝始立胡祠然惟西域桑門自傳其教西晉以上不許中國

髡髮事胡至石符亂華乃弛厥禁主庸臣佞政虐祚
短事佛致然愈特數衍其辭耳愈以人主無不欲壽
者以此劫之冀從其諫耳不意憲宗之惑深也愈至
潮州上表哀謝憲宗曰愈是愛朕謂事佛則年代不
永誠不可然憲宗自是不善聽諫賈誼言於文帝曰
生為明帝死為明神顧成之廟名為太宗當天子春
秋隆盛之時以死生言之然文帝不忌也使愈當此
時庶其說得行哉然愈所論與周公無逸之戒大異



為裴相公讓官表

臣某言伏奉今日制書以臣為朝議大夫守中書侍郎
同中書門下平章事承命驚惶魂爽飛越俯仰天地若
無所容臣某誠惶誠恐頓首頓首臣少涉經史粗知古
今天與朴忠性惟愚直知事君以道無憚殺身慕當官
而行不得利己人以為拙臣行不疑元和之初始拜御
史旋以論事過切為宰臣所非移官府廷固佐戎幕陞
下恕臣之罪憐臣之心拔居侍從之中遂掌絲綸之重

受恩益大顧已益輕苟耳目所聞知心力所造及少闕
政理輒以陳聞於裨補無涓埃之微而讒謗有丘山之
積陛下知其孤立賞其微誠獨斷不謀獎待踰量臣誠
見陛下具文武之德有神聖之姿啓中興之宏圖當太
平之昌厯勤身以儉與物無私威怒如雷霆容覆如天
地實羣臣盡節之日才智效能之時聖君難逢重德宜
報苦心焦思以日繼夜苟利於國知無不為徒欲竭愚
未免妄作陛下不加罪責更極寵光既領臺綱又毗邦

憲聖君所厚兇逆所讐闕於防虞幾至斃踣恩私曲被
性命獲全忝累祖先玷塵班列未知所措祇自內慚豈
意陛下擢臣於傷殘之餘委臣以燮和之任忘其陋污
使佐聖明此雖成湯舉伊尹於庖厨高宗登傅說於版
築周文用呂望於屠釣齊桓起甯戚於飯牛雪恥蒙光
去辱居貴以今準古擬議非倫陛下有四君之明行四
君之事微臣無四子之美獲四子之榮豈可叨居以彰
非據方今干戈未盡戢夷狄未盡賓麟鳳龜龍未盡游

郊數草木魚鼈未盡被雍熙當大有為之時得非常人之佐然後能上宣聖德以代天工如臣等類實不克堪伏願博選周行旁及巖穴天生聖主必有賢臣得而授之乃可致理乞迴所授以叶羣情無任懇款之至

唐憲宗紀元和十年六月乙丑御史中丞裴度為中書侍郎同中書門下平章事按其年盜殺宰相武元衡擊裴度傷首度墜溝得免朝議罷度以安王承宗李師道反側帝不聽度疾愈詔毋須宣政衙即延英拜為相憲

宗此舉誠為破三賊之根本唐室幾中興實繫乎此昌
黎時為考功郎中知制誥代度撰此表史稱度以權紀
未張王室陵遲常愧憤無死所文實能寫度心曲碧血
熒熒光出楮墨而辭氣渾浩流轉足為千古表箋法式
可知文體正偽固不在單辭駢語間也

御選唐宋文醇卷六

欽定四庫全書

御選唐宋文醇卷七目錄

昌黎韓愈文七

順宗實錄 祭文 哀辭

順宗實錄紀張萬福陸贄陽城

祭田橫墓文

祭郴州李使君文

祭河南張員外文

祭柳子厚文

祭侯主簿文

祭馬僕射文

祭鄭夫人文

祭十二郎文

獨孤申叔哀辭

欽定四庫全書

御選唐宋文醇卷七

昌黎韓愈文七

順宗實錄紀張萬福陸贄陽城

左散騎常侍致仕張萬福卒萬福魏州元城人也自曾祖至父皆明經官止縣令州佐萬福以祖父業儒皆不達不喜書學騎射年十七八從軍遼東有功為將而還累遷至壽州刺史州送租賦詣京師至潁川界為盜所

奪萬福使輕兵馳入潁川界討之賊不意萬福至忙迫
不得戰萬福悉聚而誅之盡得其所亡物并得前後所
掠人妻子財物牛馬萬計悉還其家為淮南節度崔圓
所忌失刺史改鴻臚卿以節度副使將兵千人鎮壽州
萬福不以為恨許杲以平盧行軍司馬將卒三千人駐
濠州不去有窺淮南意圓令萬福攝濠州刺史杲聞即
提卒去止當塗陳莊賊陷舒州圓又以萬福為舒州刺
史督淮南岸盜賊連破其黨大厯三年召赴京師代宗

謂曰聞卿名久欲一識卿且將累卿以許杲萬福拜謝
因前曰陛下以許杲召臣如河北賊諸將叛以屬何人
代宗笈曰且欲議許杲事方當大用卿即以為和州刺
史行營防禦使督淮南岸盜賊至州杲懼移軍上元杲
至楚州太掠節度使韋元甫命萬福討之未至淮陰杲
為其將康自勤所逐自勤擁兵繼掠循淮而東萬福倍
道追而殺之免者十二三盡得其所虜掠金銀婦女等
皆護致其家代宗詔以本州兵千五百人防秋京西遂

帶和州刺史鎮咸陽因留宿衛李正己反將斷江淮路
令兵守埭橋渦口江淮進奉船千餘隻泊渦口不敢進
德宗以萬福為濠州刺史萬福馳至渦口立馬岸上發
進奉船溜青將士停岸睥睨不敢動諸道繼進改泗州
刺史為杜亞所忌徵拜左金吾衛將軍召見德宗驚曰
杜亞言卿昏耄卿乃如是健耶圖形凌烟閣數賜酒饌
衣服并勅度支籍口畜給其費至賀陽城等於延英門
外天下益重其名二十一年以左散騎常侍致仕元和

元年卒年九十萬福自始從軍至卒祿食七十年未嘗病一日典九郡皆有惠愛

贈故忠州別駕陸贄兵部尚書故道州刺史陽城左常侍贄字敬輿吳郡人也年十八進士及第又以博學宏詞授鄭縣尉書判拔萃授渭南尉遷監察御史未幾選為翰林學士遷祠部員外郎德宗幸奉天贄隨行在天
下騷擾遠近徵發書詔一日數十下皆出於贄贄操筆持紙成於須臾不復起草同職皆拱手嗟嘆不能有所

助常啟德宗言方今書詔宜痛自引過罪已以感人心
昔成湯以罪已致興後代推以為聖人楚王失國亡走
一言善而復其國至今稱為賢者陛下誠能不悛改過
以言謝天下臣雖愚陋為詔詞無所忌諱庶能令天下
叛逆者迴心喻旨德宗從之故行在制詔始下聞者雖
武人捍卒無不揮淚感激議者咸以為德宗剋平寇難
旋復天位不惟神武成功爪牙宣力蓋以文德廣被腹
心有助焉累遷考功郎中諫議大夫中書舍人兼翰林

學士丁母憂免喪權知兵部侍郎復入翰林中外屬意
旦夕俟其為相竇參深忌之贄亦短參之所為且言其
黷貨於是與參不能平尋真拜兵部侍郎知禮部貢舉
於進士中得人為多八年春遷中書侍郎平章事始令
吏部每年集選人舊事吏部每年集人其後遂三年一
置選選人猥至文書多不了尋勘真偽紛雜吏因得大
為姦巧選士一蹉跌或至十年不得官而官之闕者或
累歲無人贄令吏部分内外官員為三分計闕集人以

為常其弊十去七八天下稱之初竇參出李異為常州刺史且迫其行異常銜之至參貶為郴州別駕異適遷湖南觀察德宗常與參言故相姜公輔罪參漏其語參敗公輔因上疏自陳其事非臣之過德宗詰之知參洩其語怒未有所發會異奏汴州節度劉士寧遺參金帛若干士寧得汴州參處其議士寧常德之故致厚貺德宗以參得罪而以武將交結發怒竟致參於死而議者多言參死由贊焉裴延齡判度支天下皆嫉忌而獨幸

於天子朝廷無敢言其短者。贄獨身當之日，陳其不可用。延齡因欲去贄而代之。又知贄之不與，已多阻其奏請也。謗毀百端。翰林學士吳通元故與贄同職，姦巧佻薄，與贄不相能。知贄與延齡相持有間，因盛言贄短，宰相趙璟本贄所引，同對嫉贄之權密，以贄所戢彈延齡事告延齡。延齡益得以為計。由是天子益信延齡而不直贄。竟罷贄。相以為太子賓客而黜張滂、李充等。權言事者皆言其屈贄固畏懼，至為賓客拒門不納交親士。

友春旱德宗數獵苑中延齡疏言贄等失權怨望言於衆曰天下旱百姓且流亡度支愛惜不肯給諸軍軍中人無所食其事奈何以搖動羣心其意非止欲中傷臣而已後數日又獵苑中會神策軍人跪馬前云度支不給馬草德宗意延齡前言即迴馬而歸由是貶贄為忠州別駕滂充皆斥逐德宗怒未解贄不可測賴陽城等救乃止贄之為相常以少年入翰林得幸於天子長養成就之不敢自愛事之不可者皆爭之德宗在位久益

自攬持機柄親治細事失君人大體宰相益不得行其事職而議者乃云由贄而然贄居忠州十餘年常閉門不出入人無識面者避謗不著書習醫方集古今名方為陸氏集驗方五十卷卒於忠州年五十二上初即位與鄭餘慶陽城同徵詔始下而城贄皆卒城字亢宗

北平人代為官族好學貧不能得書乃求入集賢為書寫吏竊官書讀之晝夜不出經六年遂無所不通乃去滄州中條山下遠近慕其德行來學者相繼於道閭里

有爭者不詣官府詣城以決之李泌為相舉為諫議大夫拜官不辭未至京師人皆想望風采云城山人能自苦刻不樂名利必諫諍死職下咸畏憚之既至諸諫官紛紛言事細碎無不聞達天子益厭苦之而城方與其二弟牟容連夜痛飲人莫能窺其意有懷刺譏之者將造城而問者城揣知其意輒彊與酒客或時先醉仆席上或時先醉卧客懷中不能聽客語約其二弟云吾所得月俸汝可度吾家有幾口月食米當幾何買薪菜鹽

米凡用幾錢先具之其餘悉以送酒媪無留也未嘗有
所貯積雖其所服用切急不可闕者客稱其物可愛城
輒喜舉而授之陳萇者候其始請月俸常往稱其錢帛
之美月有獲焉至裴延齡讒毀陸贄等坐貶黜德宗怒
不解在朝無救者城聞而起曰吾諫官也不可令天子
殺無罪之人而信用姦臣即率拾遺王仲舒數人守延
英門上䟽論延齡姦佞贄等無罪狀德宗大怒召宰相
入語將加城等罪良久乃解令宰相諭遣之於是金吾

將軍張萬福聞諫官伏閣諫趨往至延英門大言賀曰
朝廷有直臣天下必太平矣遂徧拜城與仲舒等曰諸
諫議能如此言事天下安得不太平也已而連呼太平
萬歲太平萬歲萬福武人時年八十餘自此名重天下
時朝夕相延齡城曰脫以延齡為相當取白麻壞之慟
哭於庭竟坐延齡事改國子司業至引諸生告之曰凡
學者所以學為忠與孝也諸生寧有久不省其親乎明
日謁城歸養者二十餘人有薛約者嘗學於城狂躁以

言事得罪將徙連州客寄有根蒂吏縱求得城家坐吏於門與約飲決別涕泣送之郊外德宗聞之以城為黨罪人出為道州刺史太學生魯卿李儻等二百七十人詣闕乞留住數日吏遮止之疏不得上在州以家人禮待吏人宜罰者罰之宜賞者賞之一不以簿書介意賦稅不登觀察使數請讓上考功第城自署第曰撫字心勞徵科政拙考下下觀察使嘗使判官督其賦至州怪城不出迎以問州吏吏曰刺史聞判官來以為已有罪

自囚於獄不敢出判官大驚馳入謁城於獄曰使君何
罪某奉命來候安否耳留一兩日未去城固不復歸館
門外有故門扇橫地城晝夜坐卧其上判官不自安辭
去其後又遣他判官崔某往按之崔承命不辭載妻子
以行中道而逃城孝友不忍與其弟異處皆不娶給侍
終身有寡妹依城以居有生年四十餘癡不能如人常
與弟負之以遊初城之妹夫亡在他處家貧不能葬城
親與其弟舁尸以歸葬於其居之側往返千餘里卒時

年六十餘

天生昌黎而所為欲作唐之一經者有志而未逮也即
順宗實錄一書亦有後人竄易處良可惜也今錄書中
三傳以存韓氏之史云

祭田橫墓文

貞元十一年九月愈如東京道出田橫墓下感橫義高
能得士因取酒以祭為文而弔之其辭曰事有曠百世
而相感者余不自知其何心非今世之所稀孰為使余
獻歎而不可禁余既博觀乎天下曷有庶幾乎夫子之
所為死者不復生嗟予去此其從誰當秦氏之敗亂得
一士而可王何五百人之擾擾而不能脫夫子於劍鉞
抑所寶之非賢亦天命之有常昔闕里之多士孔聖亦

云其遑遑苟余行之不迷雖顛沛其何傷自古死者非一夫子至今有耿光跼陳辭而薦酒魂髣髴而來享

晁无咎云唐宰相如董晉亦未足言而晉為汴州纔奏愈從事愈始終感遇語稱隴西公而不姓後從裴度亦自謂度知已然度亦終不引愈共天下事故愈躊躇發憤太息於區區之橫以為夫苟如橫之好士天下將有賢於五百人者至焉君子一言以為不知其斯言之謂歟古今學人論世之謬莫大於不計年歲而隨舉一生

之迹以就吾所論之一事今按文曰貞元十一年九月
愈如東京道出田橫墓下則其年愈方二十八歲舉宏
詞不第去明年董晉始表為汴州觀察推官也其時裴
度為監察御史以論權要梗切出為河南功曹參軍而
乃謂愈作田橫祭文為感董晉而怨裴度何其不深考
也如董晉者能屈回紇強虜降懷光賊臣以片言其為
人豈又易易而曰未足言如田橫者能感五百人皆自
劉以殉而曰區區之橫何其放言高論乃爾也稍進便

當曰區區之周公孔子矣裴度為相伐蔡引愈為行軍
司馬愈時右庶子耳歸擢刑部侍郎嚮用矣已而為迎
佛骨事直言極諫貶潮州刺史愈自為之而自當之求
仁而得仁又何怨使怨裴度不已薦真灌夫所謂不值
一錢者哉若夫稱董晉為隴西公而不姓乃一時行文
偶爾聞有諱君父之名者矣未聞有諱舉主之名者也
聞有諱君父之名者矣未聞有諱君父之姓者也以此
推崇昌黎昌黎不受也

祭郴州李使君文

維年月日將仕郎守江陵府法曹參軍韓愈謹以清酌
庶羞之奠敬祭於故郴州李使君之靈古語有之白頭
如新傾蓋若舊顧意氣之何如何日時之足究當貞元
之癸未惕皇威而左授伏荒炎之下邑嗟名類而位仆
歷貴部而西邁邇清光於暫覲言莫交而情無由既不
賈而奚售哀窮遐之無徒拏百憂以自副尋問訊之綢
繆恒飽飢而愈疲接雄詞於章句窺逸跡於篆籀苞黃

甘而致貽獲紙筆之雙貿投叉魚之短韻媿韜瑕而舉
秀族新命於衡陽費薪芻於館候空大亭以見處憇水
木之幽茂逞英心於縱博沃煩腸以清酎航北湖之空
明覲鱗介之驚透宴州樓之豁達衆管啾而並奏得恩
惠於新知脫窮愁於往陋輟行謀於俄頃見秋月之三
鼓逮天書之下降猶低迴以宿留念睽離之在期謂此
會之難又授縞紵以託心示茲誠之不謬儻後日之北
遷約窮歡於一晝雖掾俸之酸寒要拔貧而為富何人

生之難信捐斯言而莫就始訝信於暫踈遂承凶於不
救見明旌之低昂尚遲疑於別袖憶交酬而迭舞奠單
盃而哭樞美夫君之為政不撓志於讒構遭脣舌之紛
羅獨陵晨而孤雛彼憐人之浮言雖百車其何詬洞古
往而高觀固邪正之相寇幸竊覩其始終敢不明白而
蔽覆神乎來哉辭以為侑尚饗

朱子曰公貞元十九年冬出為陽山令過郴州識李
使君有李員外寄紙筆及叉魚詩即所謂獲紙筆之

雙貿投叉魚之短韻也其生平契分皆具此文筆墨
間錄云祭李郴州文尤雄奇

祭河南張員外文

維年月日彰義軍行軍司馬守太子右庶子兼御史中丞韓愈謹遣某乙以庶羞清酌之奠祭於亡友故河南縣令張十二員外之靈貞元十九君為御史余以無能同詔並跼君德渾剛標高揭已有不吾如唾猶泥滓余慙而狂年未三紀乘氣加人無挾自恃彼婉孌者實憚吾曹側肩帖耳有舌如刀我落陽山以尹鼯猱君飄臨武山林之牢歲弊寒光雪虐風饕顛於馬下我泗君眺

夜息南山同卧一席守隸防夫觚頂交跼洞庭漫汗粘
天無壁風濤相飈中作霹靂追程盲進颿船箭激南上
湘水屈氏所沈二妃行迷淚蹤染林山哀浦思鳥獸叫
音余唱君和百篇在吟君止於縣我又南踰把觥相飲
後期有無期宿界上一又相語自別幾時遽變寒暑枕
臂歌眠加余以股僕來告言虎入廐處無敢驚逐以我
驂去君云是物不駮於乘虎取而往來寅其徵我預在
此與君俱膺猛獸果信惡禱而憑余出嶺中君踈州下

偕掾江陵非余望者郴山奇變其水清寫泊砂倚石有
還無捨衡陽放酒熊咆虎嘯不存今章罰籌蝟毛委舟
湘流往觀南嶽雲壁潭潭穹林攸擢避風太湖七日鹿
角鉤登大鮎怒頰豕狗鬻盤炙酒羣奴餘啄走官階下
首下尻高下馬伏塗從事是遭予徵博士君以使已相
見京師過願之始分教東生君掾雍首兩都相望於別
何有解手背面遂十一年君出我入如相避然生濶死
休吞不復宣刑官屬郎引章訐奪權臣不愛南昌是幹

明條謹獄氓獠戶歌用遷澧浦為人受瘡還家東都起
令河南屈拜後生憤所不堪屢以正免身伸事蹇竟死
不昇孰勸為善丞相南討余辱司馬議兵大梁走出洛
下哭不憑棺莫不親暈不撫其子莫不送野望君傷懷
有隕如瀉銘君之蹟納石壤中爰及祖考紀德事功外
著後世鬼神與通君其奚憾不余鑒衷嗚呼哀哉尚饗
朱子曰貞元十九年冬公與張署自御史俱出南方
為令明年順宗即位俱徙江陵故凡道塗經涉唱和

契濶皆具此文公方從晉公討蔡祭其在元和十二年八月歟張之行治則詳於公誌

欽定四庫全書

卷七

祭柳子厚文

維年月日韓愈謹以清酌庶羞之奠祭於亡友柳子厚
之靈嗟嗟子厚而至然邪自古莫不然我又何嗟人之
生世如夢一覺其間利害竟亦何校當其夢時有樂有
悲及其既覺豈足追惟凡物之生不願為材犧尊青黃
乃木之蓄子之中棄天脫畛羈玉佩瓊琚大放厥辭富
貴無能磨滅誰紀子之自著表表愈偉不善為斲血指
汗顏巧匠旁觀縮手袖間子之文章而不用世乃令吾

徒掌帝之制子之視人自以無前一斥不復羣飛刺天
嗟嗟子厚今也則亡臨絕之音一何琅琅徧告諸友以
寄厥子不鄙謂余亦託以死凡今之交觀勢厚薄余豈
可保能承子託非我知子子實命我猶有鬼神寧敢遺
墮念子永歸無復來期設祭棺前矢心以辭嗚呼哀哉
尚饗

姚令威曰子厚以元和十四年十月五日卒於柳州
公其月自潮即表明年自表台為國子祭酒此文表

州作也故劉夢得祭子厚文有云退之承命改牧宜
陽亦馳一函候於便道其後序柳集又云凡子厚行
已之大方有退之之誌若祭文在祭文蓋謂此也

祭侯主簿文

維年月日吏部侍郎韓愈謹遣男殿中省進馬佶致祭
於亡友故國子主簿侯君之靈嗚呼惟子文學今誰過
之子於道義困不拾遺我狎我愛人莫與夷自始及今
二紀於茲我或為文筆俾子持唱我和我問我以疑我
釣我遊莫不我隨我寢我休莫爾之私朋友昆弟情敬
異施惟我於子無適不宜棄我而死嗟我之衰相好滿
目少年之時日月云亡今其有誰誰不富貴而子為羈

我無利權雖怨曷為子之方冀我方齋祠哭送不可誰
知我悲嗚呼哀哉尚饗

朱子曰詳觀公此文當知其為侯喜作公貞元十七
年與喜同漁於溫洛嘗有詩云吾黨侯生字叔迢呼
我持竿釣溫水故此又有我釣我遊莫不我隨之語
嘗薦喜於汝州刺史盧郎中又嘗薦之於陸員外修
觀其薦詞亦與此文惟子文學今誰過之之意相表
裏又公集中端有贈侯主簿喜詩用是知其非侯繼

也其曰吏部侍郎韓愈即長慶二年自兵部轉吏部
時作

祭馬僕射文

維年月日吏部侍郎韓愈謹以清酌庶羞之奠敬祭於
故僕射馬公十二兄之靈惟公弘大溫恭全德備天
故生之其必有意將明將昌實艱初試佐戎滑臺斥由
尹寺適彼甌閩隳旣跋躓顛而不踣乃得其地于泉于
虔始執郡符遂殿交州杭節番禺去其螟蠹蠻越大蘇
擢亞秋官朝得碩士人謂其崇我勢始起東征淮蔡相
臣是使公兼邦憲以副經紀殲彼大寇厥勲孰似丞相

歸治留長蔡師茫茫黍稷昔實棘茨鳩鳴雀乳不見梟
鳩惟蔡及許舊為血仇命公并侯耕借之牛束其弓矢
禮讓優優始誅郢戎厥墟腥臊公往滌之茲惟樂郊惟
東有猗惟西有虺顛覆朋鄰我餘有幾律率中居斬其
脊尾岱定河安惟公之勲帝念厥功還公於朝陟於地
官且長百僚度彼西方孰樂可據顧瞻衡鈞將舉以付
惟公積勤以疾以憂及其歸時當謝之秋賀門未歸弔
廬以萃耒燕于堂已哭于次昔我及公實同危事且死

且生誓莫捐棄歸來握手曾不三四曾不濡翰酬酢文字曾不醉飽以勸酒載奠以叙哀其何能致嗚呼哀哉尚饗

嚴有翼曰馬十二名摠字會元扶風人退之長慶三年冬自京兆尹復為兵部侍郎又遷吏部侍郎其為京兆也有舉馬摠自代狀今祭文稱吏部侍郎則摠以是年冬死也

祭鄭夫人文

維年月日愈謹於逆旅備時羞之奠再拜頓首敢昭祭
於六嫂滎陽鄭氏夫人之靈嗚呼天禍我家降集百殃
我生不辰三歲而孤蒙幼未知鞠我者兄在死而生實
維嫂恩未斷一年兄宦王官提攜負任去洛居秦念寒
而衣念飢而殮疾疹水火無蓄及身劬勞閔閔保此愚
庸年方及紀薦及凶屯兄罹讒口承命遠遷窮荒海隅
天閼百年萬里故鄉幼孤在前相顧不歸泣血號天微

嫂之力化為夷蠻水浮陸走丹旄翩然至誠感神返葬
中原既克反葬遭時艱難百口偕行避地江濱春秋霜
露薦敬蘋蘩以享韓氏之祖考曰此韓氏之門視余猶
子誨化諄諄爰來京師年在成人屢貢於王名廼有聞
念茲頻頑非訓曷因感傷懷歸隕涕熏心苟容躁進不
顧其躬祿仕而還以為家榮奔走乞假東西北南孰云
此來廼睹靈車有志弗及長負殷勤嗚呼哀哉昔在韶
州之行受命於元兄曰爾幼養於嫂喪服必以朞今其

敢忘天寶臨之嗚呼哀哉日月有時歸合塋封終天永
辭絕而復蘇伏惟尚饗

洪興祖曰夫人韓會之妻而公之嫂也公少孤而育
於其嫂文言其拊育之恩至矣公既為之服晷而祭
之以文此貞元十一年往河陽時作貞觀中魏徵令
狐德菜等議嫂叔服云或有長年之嫂遇孩提之叔
劬勞鞠養情若所生分饑共寒契濶偕老其在生也
愛之同於骨肉及其死則推而遠之求之本原深所

未諭且事嫂見稱載籍非一鄭仲虞則恩禮甚篤顏
洪都則竭誠致感馬援則見之必冠孔伋則哭之為
位察其所尚豈非先覺嫂叔舊無服今請服小功五
月制可公幼養於嫂服暮以報可為士大夫之法矣
李漢序公文集及李習之狀亦云

祭十二郎文

年月日季父愈聞汝喪之七日乃能銜哀致誠使建中
遠具時羞之奠告汝十二郎之靈嗚呼吾少孤及長不
省所怙惟兄嫂是依中年兄歿南方吾與汝俱幼從嫂
歸葬河陽既又與汝就食江南零丁孤苦未嘗一日相
離也吾上有三兄皆不幸早世承先人後者在孫惟汝
在子惟吾兩世一身形單影隻嫂常撫汝指吾而言曰
韓氏兩世惟此而已汝時尤小當不復記憶吾時雖能

記憶亦未知其言之悲也吾年十九始來京城其後四年而歸視汝又四年吾往河陽省墳墓遇汝從嫂喪來葬又二年吾佐董丞相於汴州汝來省吾止一歲請歸取其孥明年丞相薨吾去汴州汝不果來是年吾佐戎徐州使取汝者始行吾又罷去汝又不果來吾念汝從於東東亦客也不可以久圖久遠者莫如西歸將成家而致汝嗚呼孰謂汝遽去吾而殁乎吾與汝俱少年以爲雖暫相別終當久相與處故捨汝而旅食京師以求

斗斛之祿誠知其如此雖萬乘之公相吾不以一日輟
汝而就也去年孟東野往吾書與汝曰吾年未四十而
視茫茫而髮蒼蒼而齒牙動搖念諸父與諸兄皆康彊
而早世如吾之衰者其能久存乎吾不可去汝不肯來
恐旦暮死而汝抱無涯之戚也孰謂少者歿而長者存
彊者夭而病者全乎嗚呼其信然邪其夢邪其傳之非
其真邪信也吾兄之盛德而天其嗣乎汝之純明而不
克蒙其澤乎少者彊者而夭歿長者衰者而存全乎未

可以為信也夢也傳之非其真也東野之書耿蘭之報何為而在吾側也嗚呼其信然矣吾兄之盛德而天其嗣矣汝之純明宜業其家者不克蒙其澤矣所謂天者誠難測而神者誠難明矣所謂理者不可推而壽者不可知矣雖然吾自今年來蒼蒼者或化而為白矣動搖者或脫而落矣毛血日益衰志氣日益微幾何不從汝而死也死而有知其幾何離其無知悲不幾時而不悲者無窮期矣汝之子始十歲吾之子始五歲少而彊者

不可保如此孩提者又可冀其成立邪嗚呼哀哉嗚呼
哀哉汝去年書云比得軟脚病往往而劇吾曰是疾也
江南之人常常有之未始以為憂也嗚呼其竟以此而
殞其生乎抑別有疾而至斯乎汝之書六月十七日也
東野云汝歿以六月二日耿蘭之報無月日益東野之
使者不知問家人以月日如耿蘭之報不知當言月日
東野與吾書乃問使者使者妄稱以應之耳其然乎其
不然乎今吾使建中祭汝弔汝之孤與汝之乳母彼有

食可守以待終喪則待終喪而取以來如不能守以終喪則遂取以來其餘奴婢並令守汝喪吾力能改葬終葬汝於先人之兆然後惟其所願嗚呼汝病吾不知時汝歿吾不知日生不能相養以共居歿不得撫汝以盡哀斂不憑其棺窆不臨其穴吾行負神明而使汝天不孝不慈而不得與汝相養以生相守以死一在天之涯一在地之角生而影不與吾形相依死而魂不與吾夢相接吾實為之其又何尤彼蒼者天曷其有極自今已

往吾其無意於人世矣當求數頃之田於伊潁之上以
待餘年教吾子與汝子幸其成長吾女與汝女待其嫁
如此而已嗚呼言有窮而情不可終汝其知也邪其不
知也邪嗚呼哀哉尚饗

樊汝霖曰老成率府叅軍韓介之子也介二子曰百
川曰老成起居舍人會無子以老成為後老成生湘
滂百川死公乃命滂歸後其祖介公及會介皆仲卿
子至是會介百川皆死矣故文曰吾上有三兄皆不

幸早世承先人後者在孫惟汝在子惟吾又云去年東野往吾書與汝益貞元十八年有送東野序即是年為十九年此文必其秋冬作十二月則公謫陽山矣斯文益公所謂喜往復善自道者在當時無對後二百七十年歐陽文忠公為其父作瀧岡阡表始足以追配公此作覽者當自知之


獨孤申叔哀辭

衆萬之生誰非天邪明昭昏蒙誰使然邪行何為而怒
居何故而憐邪胡喜厚其所可薄而恒不足於賢邪將
下民之好惡與彼蒼懸邪抑蒼茫無端而變寓其間邪
死者無知吾為子慟而已矣如有知也子其自知之矣
濯濯其英曄曄其光如聞其聲如見其容烏虜遠矣何
日而忘

朱子考異載申叔字子重年二十一舉進士又二年用

博學宏詞為校書郎又三年居父喪未練而歿蓋貞元十八年也柳子厚有獨孤君墓碣皇甫持正有傷獨孤賦而公作辭哀之公嘗與崔羣書天人好惡之說與此語意一同蓋出太史公之伯夷論也今按與崔羣書意與此不同彼所重在人固有薄卿相之位以下數語見貧富貴賤壽夭皆非天之好惡所存聖賢固好善而惡惡矣天亦唯有好善而惡惡苟善矣貧賤天死不足為重輕猶既得照乘之珠則瓦礫雖百車匪我思存矣故

下文云崔君崔君無怠無怠朋友相礪之辭也此則哀
申叔之死而呼天以問之猶楚辭天問之類體裁各異
則語雖同而義自不得而同也



御選唐宋文醇卷七